



NEGERI PAHANG

TAMBAHAN PERUNDANGAN

AKTA KERAJAAN TEMPATAN 1976 [Akta 171]

Phg. P.U. 10/1990

UNDANG-UNDANG KECIL IKLAN PILIHANRAYA (MAJLIS DAERAH PEKAN) 1990

[Mengandungi pindaan terkini Phg.P.U.13/2012]

Tarikh penyiaran:
Tarikh mula berkuatkuasa:

27 September 1990
27 September 1990

SUSUNAN UNDANG-UNDANG KECIL

Mukadimah

- Undang-Undang Kecil 1. Nama dan pemakaian
- Undang-Undang Kecil 2. Takrif
- Undang-Undang Kecil 3. Larangan ke atas pameran iklan pilihanraya
- Undang-Undang Kecil 4. Permohonan untuk permit
- Undang-Undang Kecil 5. Bentuk dan jangkamasa permit
- Undang-Undang Kecil 6. Daftar permit
- Undang-Undang Kecil 7. Pengalihan iklan pilihanraya selepas hari mengundi
- Undang-Undang Kecil 8. Pengalihan iklan pilihanraya oleh Majlis
- Undang-Undang Kecil 9. Perlucuthakan deposit
- Undang-Undang Kecil 10. Cara-cara mempamerkan iklan pilihanraya
- Undang-Undang Kecil 11. Larangan terhadap mempamerkan iklan pilihanraya di tempat-tempat tertentu
- Undang-Undang Kecil 12. Kesalahan dan penalti am

SENARAI PINDAAN

Mukadimah

PADA menjalankan kuasa-kuasa yang diberikan oleh seksyen 102 Akta Kerajaan Tempatan 1976, Majlis Daerah Pekan membuat, dan menurut seksyen 103 Akta tersebut Pihakberkuasa Negeri mengesahkan, undang-undang kecil yang berikut:

1. Nama dan pemakaian.

(1) Undang-undang Kecil ini bolehlah dinamakan **Undang-undang Kecil Iklan Pilihanraya (Majlis Daerah Pekan) 1990.**

(2) Undang-undang Kecil ini hendaklah terpakai bagi kawasan Majlis Daerah Pekan sahaja.

2. Takrif.

Dalam Undang-undang Kecil ini, melainkan jika konteksnya menghendaki makna yang lain –

“Majlis” ertinya Majlis Daerah Pekan;

“hari mengundi”, berhubung dengan sesuatu pilihanraya, ertinya hari yang ditentukan dalam writ bagi pilihanraya itu untuk pengundian dilakukan;

“iklan pilihanraya” ertinya apa-apa bendera, merual, tertunggul, panji-panji, cogan kata, poster atau label yang dipamerkan sebagai atau bagi maksud dakyah politik;

“permit” ertinya permit untuk mempamerkan iklan Pilihanraya yang dikeluarkan di bawah undang-undang kecil 4;

“parti politik” mempunyai erti yang sama seperti dalam Akta Pertubuhan 1966 (*Akta 335.*);

“pilihanraya” ertinya suatu pilihanraya Parlimen atau satu pilihanraya Negeri;

“writ” ertinya writ bagi pilihanraya yang dikeluarkan di bawah seksyen 12 Akta Pilihanraya 1958. (*Akta 19*)

3. Larangan ke atas pameran iklan pilihanraya.

Tiada seorang pun boleh mempamerkan atau menyebabkan dipamerkan apa-apa iklan pilihanraya di mana-mana lebuah atau tempat kecuali di bawah dan mengikut permit yang dikeluarkan oleh Majlis.

4. Permohonan untuk permit.

(1) Sesuatu permohonan untuk permit bagi mempamerkan apa-apa iklan pilihanraya hendaklah dibuat kepada Majlis -

(a) oleh parti politik yang berhasrat untuk meletakkan calon dalam bahagian pilihanraya yang berkenaan; atau

(b) jika orang yang akan bertanding dalam pilihanraya itu tidak mempunyai gabungan politik, oleh orang itu sendiri.

(2) Suatu permohonan di bawah perenggan (1) hendaklah dibuat dalam apa-apa borang yang ditentukan oleh Majlis.

(3) Apabila menerima permohonan itu, Majlis hendaklah, atas pembayaran jumlah wang sebanyak lima ribu ringgit sebagai deposit bagi pematuhan syarat-syarat permit dan peruntukan-peruntukan Undang-undang Kecil ini, mengeluarkan kepada pemohon suatu permit bagi mempamerkan iklan pilihanraya dalam kawasan-kawasan yang dinyatakan dalam permit.

[(3) Pin.Phg.P.U.13/2012]

(4) Majlis boleh melampirkan, pada mana-mana permit yang dikeluarkan di bawah perenggan (3), apa-apa syarat yang difikirkannya patut dikenakan.

(5) Pemegang permit hendaklah mematuhi segala syarat yang dilampirkan pada permit itu.

5. Bentuk dan jangkamasa permit.

Suatu permit yang dikeluarkan di bawah undang-undang kecil 4 hendaklah dalam apa-apa bentuk yang ditentukan oleh Majlis dan hendaklah habis tempohnya pada hari yang berikutan hari mengundi.

6. Daftar permit.

Majlis hendaklah menyebabkan disimpan dan disenggarakan dalam apa-apa bentuk dan mengikut apa-apa cara yang ditentukannya, suatu daftar bagi segala permit yang dikeluarkan di bawah undang-undang kecil 4.

7. Pengalihan iklan pilihanraya selepas hari mengundi.

Tiap-tiap pemegang permit hendaklah, dalam masa empat belas hari selepas hari mengundi, mengalihkan segala iklan pilihanraya yang dipamerkan, dan segala papan tanda atau struktur lain yang didirikan, olehnya.

8. Pengalihan iklan pilihanraya oleh Majlis.

(1) Majlis boleh mengalihkan apa-apa iklan pilihanraya atau apa-apa papan tanda atau struktur lain yang didirikan bagi maksud mempamerkan iklan pilihanraya itu jika –

(a) pemegang permit gagal mematuhi kehendak-kehendak undang-undang kecil 7; atau

(b) Majlis berpuas hati bahawa iklan pilihanraya itu dipamerkan tanpa permit.

(2) Segala perbelanjaan yang dilakukan oleh Majlis dalam menjalankan kuasa-kuasa yang diberikan oleh perenggan (1) hendaklah disifatkan sebagai hutang yang kena dibayar kepada Majlis oleh pemegang permit atau, jika iklan pilihanraya itu dipamerkan tanpa permit, oleh orang yang menyebabkan iklan

pilihanraya itu dipamerkan sedemikian, dan hendaklah didapatkan kembali dalam mahkamah dengan sewajarnya.

9. Perlucuthakan deposit.

(1) Tanpa menjejaskan peruntukan-peruntukan lain dalam Undang-undang Kecil ini, jika –

(a) terdapat suatu pelanggaran apa-apa syarat permit; atau

(b) terdapat apa-apa pelanggaran atau ketakpatuhan mana-mana peruntukan Undang-undang Kecil ini,

Majlis hendaklah melucuthakkan deposit yang dibayar di bawah undang-undang kecil 4 jika, selepas memberikan pemegang permit suatu peluang untuk didengar, dia gagal memuaskan hati majlis tentang kenapa deposit itu tidak sepatutnya dilucuthakkan.

(2) Apa-apa deposit yang tidak dilucuthakkan di bawah perenggan (1) hendaklah dikembalikan kepada pemegang permit tanpa apa-apa faedah selepas empat belas hari dari masa habisnya tempoh permit itu.

10. Cara mempamerkan iklan pilihanraya.

Sesuatu iklan pilihanraya hendaklah dipamerkan mengikut mana-mana cara yang berikut sahaja –

(a) dengan melekatkannya pada suatu papan tanda atau struktur lain yang didirikan atau diletakkan oleh pemegang permit;

(b) dengan menggantung iklan pilihanraya itu di sepanjang mana-mana lebu, pada pancang-pancang yang didirikan oleh pemegang permit;

(c) dengan menanam penopang iklan pilihanraya itu ke dalam mana-mana paras tanah selain daripada laluan jalan kaki yang diubinkan atau kaki lima; atau

(d) dengan apa-apa cara lain sebagaimana yang dinyatakan oleh Majlis dalam permit.

11. Larangan terhadap mempamerkan iklan pilihanraya di tempat-tempat tertentu.

Walau apa pun apa-apa peruntukan lain dalam Undang-undang Kecil ini, tiada seorang pun boleh –

(a) mempamerkan apa-apa iklan pilihanraya atau membina atau mendirikan apa-apa papan tanda atau struktur lain mengikut apa-apa cara sehinggakan ia meliputi atau melindungi apa-apa isyarat lalulintas, tanda arahan atau lampu perhiasan;

(b) mempamerkan apa-apa iklan pilihanraya atas atau merintang mana-mana lebu; atau

(c) mempamerkan apa-apa iklan pilihanraya pada mana-mana bangunan awam atau struktur lain dengan menggunakan paku, gam, atau pelekat lain, atau dengan apa-apa cara lain yang akan merosakkan atau mencatitkan permukaan bangunan atau struktur itu.

12. Kesalahan dan penalti am.

Mana-mana orang yang melanggar atau gagal mematuhi mana-mana peruntukan Undang-undang Kecil ini adalah melakukan suatu kesalahan dan boleh, apabila disabitkan, dikenakan denda tidak melebihi dua ribu ringgit.

Bertarikh di Kuantan, pada 22hb Ogos 1990.
[SUK.Phg. (KT) 5530.]

ABU HASSAN BIN HAJI SAIDIN,
Setiausaha,
Majlis Mesyuarat Kerajaan,
Pahang

SENARAI PINDAAN

<i>Undang-undang yang meminda</i>	<i>Tajuk ringas</i>	<i>Berkuat kuasa dari</i>
Phg.P.U.13/2012	Undang-undang Kecil Iklan Pilihanraya (Majlis Daerah Pekan) (Pindaan) 2012.	24 Mei 2012